

NEAUTORIZIRANI TRANSKRIPT
5. SJEDNICE DOMA NARODA PARLAMENTARNE SKUPŠTINE
BOSNE I HERCEGOVINE,
održane 10.04.2003. godine s početkom u 15,05 sati

PREDSJEDAVAJUĆI
VELIMIR JUKIĆ

Poštovani izaslanici, vaša ekscelencije, poštovani gosti, predstavnici sredstava javnog informiranja.

Sve vas skupa pozdravljam i evo otvaram 5. sjednicu Doma naroda Parlamentarne skupštine Bosne i Hercegovine.

/INTONIRANJE HIMNE/

Na sjednici je nazočno 14 izaslanika, od toga 4 iz reda bošnjačkog reda, 5 iz reda hrvatskog naroda i 5 iz reda srpskog naroda. Gospodin Čengić je opravdao svoj izostanak.

Imamo dakle kvalitetan kvorum, možemo raditi i odlučivati.

Dnevni red ste dobili u pozivima. Ja ću ga pročitati.

1. Potvrđivanje imenovanja člana Predsjedništva Bosne i Hercegovine,
2. Prijedlog zaključka o osnivanju zajedničke komisije oba doma za evropske integracije.

Otvaram raspravu o prijedlogu dnevnog reda.

Gospodin Milojević. Gospodine Milojeviću izvolite.

GORAN MILOJEVIĆ

Gospodine predsjedavajući, drage kolege, dragi gosti, ja predlažem da uvrstimo kao treću tačku dnevnog reda – Tekuća pitanja.

Ako je potrebno ja mogu odmah obrazložiti ili kasnije.

VELIMIR JUKIĆ

Nema potrebe. Zahvaljujem.

Slažemo se?

Ima li još neko potrebu da dopuni dnevni red. Nema.

Predlažem da se izjasnimo o dopuni dnevnog reda.

Dakle ko je zato da u dnevni red uvrstimo i treću točku – Tekuća pitanja?

Ko je za?

Konstatiram da smo jednoglasno usvojili dnevni red sa proširenjem za točku – Tekuća pitanja. Zahvaljujem.

Prelazimo na prvu točku dnevnog reda. Ona glasi

Ad. 1. Potvrđivanje imenovanja člana Predsjedništva Bosne i Hercegovine

Kao što vam je poznato na jučerašnjoj sjednici Zastupničkog doma Parlamentarne skupštine Bosne i Hercegovine, Zastupnički dom je izabrao, sukladno Ustavu i procedurama Izbornog zakona gospodina Borislava Paravca za člana Predsjedništva Bosne i Hercegovine.

Na temelju, izvješće ste dobili od Zastupničkog doma, na temelju članka 6. Zakona o popunjavanju upražnjenog mjesta člana Predsjedništva Bosne i Hercegovine imenovanje potvrđuje većina poslanika u Domu naroda koji pripadaju istom konstruktivnom narodu kao i imenovani.

Ovdje kod nas je to poznato. Radi se znači o pripadnicima srpskog naroda.

Ja otvaram raspravu po ovom pitanju. Niko se ne javlja za raspravu. Raspravu zaključujem i dajem na izjašnjenje.

Molim izaslanike iz reda srpskog naroda da se izjasne o potvrdi imenovanja izbora imenovanja gospodina Borislava Paravca za člana Predsjedništva Bosne i Hercegovine?

Ko je za?

Konstatiram da smo da je gospodin Borislav Paravac jednoglasno izvršena potvrda imenovanja, izbora imenovanja za člana Predsjedništva Bosne i Hercegovine.

Ja gospodinu Paravcu čestitam i pozivam ga da nam se kratko obrati.

BORISLAV PARAVAC

Hvala gospodine predsjedavajući, poštovani narodni poslanici, želim da izrazim svoje zadovoljstvo što se kao evo novoizabrani član Predsjedništva Bosne i Hercegovine iz reda srpskog naroda prvo obratim ovom domu.

Ovo nije kurtoazna izjava ni slučajno, jer ne zaboravite da sam ja bio delegat u prvom sazivu Vijeća naroda Parlamentarne skupštine Bosne i Hercegovine.

Ja se zahvaljujem ovom domu što mi je omogućio da se ova procedura provede i zahvaljujem se srpskim poslanicima iz Republike Srpske što su dali svoj glas za ovaj prijedlog i želim da steknem ubjeđenje da ovo povjerenje koje su mi dali nikada neće biti iznevjereno.

Vama poštovani poslanici u Domu naroda želim uspješan rad i da ni jedna delegacija ne dođe u takvu priliku da mora da potegne pitanje vitalnih interesa za pojedina zakonska rješenja. To želim i sebi kao novom članu Predsjedništva da riječ veto za mene bude nepoznata, a da isto to želim i svojim kolegama gospodinu Čoviću i gospodinu Tihiću.

Ja sam ubjeđenja da u jednom trouglu između Parlamentarne skupštine, Vijeća ministara od koga mnogo očekujem i Predsjedništva Bosne i Hercegovine može se razviti jedna pozitivna energija i može se stvoriti jedna snaga i sila koja bi naše narode izvukla iz ovog siromaštva i približila ga evropskim i euroatlanskim integracijama.

U to ime ja vas još jednom pozdravljam i zahvaljujem. Hvala.

VELIMIR JUKIĆ

Evo, svi žele čestitati još jednom članu Predsjedništva pa ćemo tako i.

Evo, ja ću još jedanput u svoje osobno ime i u ime Doma naroda Parlamentarne skupštine Bosne i Hercegovine čestitati gospodinu Borislavu Paravcu, novom članu Predsjedništva Bosne i Hercegovine i zahvaliti se na ovim i poticajnim i ja bih rekao ohrabrujućim i optimističnim očekivanjima i očekujem stvarno da se i dogodi kao što je rekao gospodin Paravac. Znači da svi skupa i sa puno sloge i bez puno nesloge, odnosno da nema potrebe za potezanjem vitalnih interesa ili vetom itd. dakle u punoj slozi radimo za dobro svih naroda i građana ove države.

Evo u toj vjeri ja bih sa ovom tačkom završio i krenemo na, krećemo na drugu tačku

Ad. 2. Prijedlog zaključka o osnivanju zajedničke komisije oba doma za evropske integracije

Sukladno članku 42. točka 3. Poslovnika Doma naroda, Zaključak vam je podijeljen pred samu sjednicu, a u skladu sa članom 39. Poslovnika doma naroda mogu se osnovati zajedničke komisije oba doma Parlamentarne skupštine BiH.

Zastupnički dom je na svojoj 11. sjednici održanoj, 9.4.2003. godine usvojio ovaj zaključak. Zaključak smo dobili i ja predlažem, ovo je usuglašeno na Zjedničkom kolegiju.

Evo ja po ovom zaključku po ovoj točki otvaram raspravu. Da li se netko javlja za raspravu? Ako ne ja ću samo dvije rečenice.

Vi znate da je u okviru potprijemnih obveza Bosne i Hercegovine u prijem u Vijeće Evrope jedna od obveza i formiranje radnih tijela u Parlamentu Bosne i Hercegovine koja bi bila nadležna i za pitanja evropskih integracija.

I ovo je jedna od komisija koje trebamo formirati i koju trebamo staviti što prije u punu funkciju kako bi mogli razmatrati sva ona pitanja koja će biti i koja su već određena u nadležnost ove komisije.

Evo, ako se niko ne javlja ja pozivam. Dobro, evo ovdje me upozoravaju da idemo redosljedom. Znači da najprije donesemo, usvojimo ovaj zaključak, pa onda ćemo kasnije imenovati komisiju.

Ko je za donošenje ovakvog zaključka?
Ko je za? Jeste. Jednoglasno. Zahvaljujem.

Konstatiram da smo jednoglasno donjeli zaključak o formiranju zajedničke komisije za evropske integracije. Zahvaljujem.

Drugi dio. Imenovanje ove komisije. U Komisiju za evropske integracije iz Doma naroda bira se šest članova i to po dva iz reda srpskog naroda, po dva iz reda hrvatskog naroda i dva iz reda bošnjačkog naroda.

Molim predsjednik klubova da daju svoje prijedloga. Iz reda srpskog naroda pozivam, gospodin Milojević.

GORAN MILOJEVIĆ

U ime Srpskog kluba predlažem da u Komisiju za evropske integracije, znači Zajedničku komisiju oba doma Parlamenta Bosne i Hercegovine budu kandidovani gospodine

- Boško Šiljegović i
- dr Vinko Radovanović.

VELIMIR JUKIĆ

Zahvaljujem gospodine Milojeviću. Pozivam predsjednika Kluba hrvatskog naroda gospodina Antu Spajića da iznese prijedlog.

ATNO SPAJIĆ

Gospodine predsjedatelju, štovane dame i gospodo ispred Hrvatskog kluba još jednom iskrene čestitke gospodinu Paravcu, a u Zajedničku ovu komisiju za europske integracije predlaže se gospodin

- Branko Zrno i gospodin
 - Ilija Filipović.
- Hvala.

VELIMIR JUKIĆ

Zahvaljujem gospodine Spajiću. Iz reda bošnjačkog naroda pozivam gospodina Halida Genjca da iznese prijedlog.

HALID GENJAC

Poštovane kolege Klub Bošnjaka predlaže gospodina Neimarliju i mene tj. mene.

VELIMIR JUKIĆ

Zahvaljujem gospodinu Genjcu.

Ja ću sada evo ponoviti prijedloge tako da bude prijedlog cjelovit. Dakle prijedlog svih šest članova je sljedeći:

- gospodin Boško Šiljegović,
- gospodin Vinko Radovanović
- gospodn Branko Zrno,
- gospodin Ilija Filipović,
- gospodin Halid Genjac i
- gospodin Hilmo Neimralija.

Ovo je prijedlog. Molim da se izjasnimo o prijedlogu.

Ko je za?

Jednoglasno. Zahvaljujem.

Konstatiram da smo jednoglasno izabrali članove Zajedničke komisije za europske integracije.

Zahvaljujem svima i prešli bismo time na treću točku dnevnog reda, a ona glasi

Ad. 3. Tekuća pitanja

Gospodin Goran Milojević je ovu točku kandidirao i evo čućemo njegovu obrazloženje, odnosno ono što ima reći. Gorane izvoli.

GORAN MILOJEVIĆ

Hvala. Poštovane kolege, dragi gosti ja sam kandidovao ovu tačku dnevnog reda tekuća pitanja, jer sada na pauzi između ove plenarne sjednice i ove naše sjednice zatekao sam u kabinetu materijal koji se odnosi na pitanja vezana za proces stabilizacije i pridruživanja Bosne i Hercegovine.

Ja ne znam da li ste to vi zatekli na svojim stolovima? I Mi smo praktično, to se znači odnosi na onih 346 pitanja koje je gospodin predsjedavajući Savjeta ministara gospodin Terzić donjeo iz Brisela na koje institucije Bosne i Hercegovine treba da daju odgovore. Dio tih odgovora odnosi se na Parlament Bosne i Hercegovine.

Znači radi se isključivo o političkim pitanjima, tako je i naglašeno u tim pitanjima koja su podjeljena na politička, ekonomska i pitanja vezana za sporazum o stabilizaciji.

Mi smo dobili ponuđene odgovore od službenika ovog parlamenta. Dakle mi se nismo tim bavili ni kao delegati, odnosno kao poslanici ove skupštine. Dobili smo ponuđene prijedloge odgovora uz napomenu da do 14.aprila ove godine, dakle do ponedjeljka eventualne svoje primjedbe damo kako bi se one eventualno uvrstile u odgovore koji se odnose na Parlament Bosne i Hercegovine.

Znači ja evo u ovom iznosim svoje zamjerke u vezi s tim da zaposleni u Skupštini Bosne i Hercegovine daju odgovore na politička pitanja i moja primjedba je takođe vezana za rok do kada mi ta pitanja moramo, odnosno odgovore dostaviti kako ovdje stoji Direkciji, našoj direkciji za evropske integracije.

Moj prijedlog je inače da mi zajedno sa Predstavničkim domom ovog parlamenta formiramo jednu radnu grupu koja će dati odgovore na ova politička pitanja. Zahvaljujem.

VELIMIR JUKIĆ

Zahvaljujem gospodinu Milojeviću. Ko želi? Gospodin Spasojević. Gospodine Spasojeviću izvolite.

ZORAN SPASOJEVIĆ

Gospodine predsjedavajući, kolege poslanici, ja želim jedno pitanje da postavim Kolegijumu ovog doma. Riječ je o onim upitnicima koje smo dobili od Izborne komisije. Ja taj upitnik još nisam predao i ne znam u kojem stanju je, kada to treba da predam jer tamo je rok bio nekih 30 mjeseci. Mi smo tri, mjesec dana mi smo tražili prolongiranje, odnosno smanjivanje onih broja pitanja koji je, pa želio bih da čujem malo oko toga i koji je krajnji rok da se to preda. Hvala vam.

VELIMIR JUKIĆ

Zahvaljujem gospodinu Spasojeviću. Ko još želi govoriti?

Evo ako nema, čuli smo i prijedlog, zapravo su ova dva prijedloga skoro i identična.

Znači ne slažemo se sa ovakvim načinom rada i smatramo da bi bilo dobro formirati povjerenstvo i to zajedničko, znači da mi to usuglasimo sa Zastupničkim domom i da se formira radna grupa koja će dati odgovore na ova pitanja.

Gospodin Milojević je dobro primjetio i tako piše. Klasificiranje ovih pitanja piše da su ovo politička pitanja. Stvarno politička pitanja koja se tiču rada ovoga doma, odnosno cijelog Parlamenta treba odgovoriti svakako i ljudi iz Parlamenta odnosno oni koji su zaduženi za rad u Parlamentu. Pa oni mogu i ja sam, evo sebi ću dati za pravo reći, mogu i ocjenjivati rad Parlamenta.

Ne znam ovaj rok, mene malo iskreno buni. Ne znam ni ja zašto je tako baš tijesan, svega koliko, znači od danas 4 dana.

GORAN MILOJEVIĆ

Taj nam rok, izvinjavam se daje Direkcija za evropske integracije, a ja nisam uspio naći do kada smo mi dužni kao Bosna i Hercegovina da damo sve odgovore.

MUSTAFA PAMUK

A kada je to došlo? Kada je došlo u Parlament? Molim. Ja to nisam dobio.

NEVENKA SAVIĆ

/nije izašla za govornicu/

VELIMIR JUKIĆ

Vidite ja bih ovo stavio sve, rekli u mikrofoni, ali mi smo čuli ovdje kako je dvorana relativno mala, a nas nema puno čujemo se.

Međutim ja onda nalazim zamjerku našoj direkciji za evropske integracije koja nije na vrijeme reagirala. Jer ovo je došlo, koliko ima? Deset dana da je došlo iz Brisla, jel tako, odnosno 26. jeste. Znači 15 dana ima da je došlo iz Brisela. Prema tome to barem ima tjedan dana je bilo čini mi se.

Mi smo dobili doslovno minut prije početka ove sjednice.

MUSTAFA PAMUK

Ja moram reći da nisam ni dobio, ali došlo je u kabinet.

VELIMIR JUKIĆ

Da ne bi ipak, da bi se mi uklopili u ove neke zadane rokove, ja predlažem da ovo riješimo na način kao što je predloženo.

Gospodin Spasojević ima intervenciju. Izvolite.

ZORAN SPASOJEVIĆ

/nije izašao za govornicu/

VELIMIR JUKIĆ

Ili komisija, ja, je zajednička komisija teško će. Može naš dio komisije. Dobro, evo možda je to najbolji prijedlog.

Znači prijedlog, ako se slažete, znači da ova komisija koju smo upravo imenovali prije 10 minuta, znači naš dio komisije za evropske integracije i Kolegij da se sutra sastane i tijekom dana se odredi

_____ (?)

/nije izašao za govornicu/

VELIMIR JUKIĆ

Ali to je. Jeste. Dobro. Evo ja sam predložio znači da to bude ipak znači kao što sam rekao. Da ne ponavljam. Znači naš dio ove komisije za evropske integracije i Kolegij da sutra se sastane. Dogovorićemo vrijeme i da se stvarno ovo prouči i onda ovi odgovori ponude onako kako mislimo da trebaju izgledati.

Gospodin Milojević.

GORAN MILOJEVIĆ

Ovo su pitanja koja se odnose na Parlamentarnu skupštinu Bosne i Hercegovine. Prema tome, ja smatram da u toj grupi koja će dati odgovore trebaju biti predstavnici iz Predstavničkog doma, ne samo mi.

VELIMIR JUKIĆ

To možemo samo sa njima dogovarati. Jeste. Dobro, ja mislim da možemo to znači riješiti da mi se ipak sastanemo u sastavu kojeg smo ovdje rekli, a da konsultiramo dakako kolege iz Zastupničkog doma, jer se tiče rada Parlamentarne skupštine.

Evo mi ćemo sutra sastati se i konsultirati ćemo njih. Pozvaćemo njih, jer nemamo puno vremena. Pazite, imamo dva dana. Imamo sutra i u ponedjeljak do eventualno do podne.

Možemo li usvojiti ovakav zaključak?

Ko je za ovakav zaključak?

Ko je za?

Jednoglasno. Zahvaljujem.

Konstatiram da smo jednoglasno usvojili zaključak da se ova evo.

Dobro. Možemo li ovako da ipak to odmah dogovorimo i vrijeme da to bude sutra u podne. Evo svi smo ovdje. U podne. Dobro u 12 sati. Dobro, evo dogovorili smo.

Ima li još neko nešto pod tekuća pitanja?

_____ (?)
/ nije izašao za govornicu/

VELIMIR JUKIĆ

Molim, nisam. Ispričavam se.

Ovako, ja sam osobno ovih dana razgovarao sa Izbornom komisijom šta ćemo mi sa onim nepopunjenim obrascem. Oni su nam tada rekli da oni postupaju samo po zakonu i da po zakonu ono treba nako uraditi.

Na moje primjedbe oni su rekli da se slažu sa mojim i našim primjedbama, ali da oni nas podstiču da mi pokrenemo proceduru izmjene zakona, jer su ono ustvari odredbe koje su zakonom određene, a koje nisu u skladu sa ne znam ni ja nekakvim čini mi se niti normama, niti onome što nama zapravo treba. Evo to je bio moj razgovor, ja stvarno ne znam šta uraditi.

Ja predlažem da mi popunimo koliko znamo podataka, da onda idemo u proceduru izmjene zakona, kada za to bude vrijeme jel, kada ocijenimo to.

Evo, ja zahvaljujem. Sjednica je završena hvala svima.

Sjednica je završila sa radom u 15,40 sati.